



KERATAN AKHBAR DAN MEDIA ONLINE UNTUK MAKLUMAN :

**Y.B. MENTERI
Y.B. TIMBALAN MENTERI
Y.BHG. KSU
Y.BHG. TKSU (PDN)
Y.BHG. TKSU (PPP)
SETIAUSAHA AKHBAR**

2 JANUARI 2023 (ISNIN)



KEMENTERIAN PERDAGANGAN DALAM NEGERI
DAN KOS SARA HIDUP

KERATAN AKHBAR DAN MEDIA ONLINE (KPDN)

2 JANUARI 2023 (ISNIN)

Program Bakul Rahmah bantuan secara bulanan

Agihan barangan keperluan asas ringankan beban golongan B40

Olea Mohd Iskandar Ibrahim
mohd_iskandar@bh.com.my

Kuala Lumpur: Program Bakul Rahmah berkonsepkan kongsi rezeki, memberi bantuan secara bulanan dan bukan 'one off' (sekali beri) kepada golongan B40 yang paling terkesan dengan kos sara hidup.

Inisiatif terbaru Kementerian Perdagangan Dalam Negeri dan Kos Sara Hidup (KPDN) itu adalah bantuan berupa barangan keperluan asas, antaranya minyak masak, tepung, gula dan beras.

Menteri, Datuk Seri Salahuddin Ayub, berkata program itu membabitkan kerjasama dengan beberapa pemain industri peruncitan.

"Sebagai produk dan jenama baharu kementerian, Bakul Rahmah iaitu bakul kasih sayang, fokus kita adalah kepada golongan B40 paling bawah sekali, seperti keluarga yang ada pesakit kronik, ibu tunggal dan mereka yang benar-benar memerlukan."

"Ia membabitkan beberapa

program yang akan saya bincang secara teliti dengan pemegang taruh seperti Speedmart, Mydin, NSK, Giant. Mereka semua ada program kebajikan tersendiri dan ini akan saya selaraskan," katanya kepada *BH*, semalam.

Kelmarin, menerusi perkongsian di Facebook, beliau memaklumkan mengadakan pertemuan dengan pemain industri peruncitan bagi menjayakan Bakul Rahmah untuk membantu rakyat memerlukan.

Konsep kongsi rezeki

Mengulas lanjut, Salahuddin berkata, program terbabit lebih kepada konsep tanggungjawab

sosial korporat dan ia tidak membabitkan implikasi kewangan kerajaan.

"Ini sama seperti konsep kongsi rezeki, yang senang kongsi rezeki dengan yang susah. Walaupun sedikit, ini adalah semangat untuk kita mendepani isu kos sara hidup. Walaupun kecil, ia sangat bermakna kepada golongan ini."

"Saya akan cuba melancarkan program ini sebelum tempoh 100 hari saya memasuki pejabat," katanya.

Selain itu, beliau berkata, KPDN akan memberi tumpuan mencari penyelesaian terbaik bagi menaik taraf kelestarian rakyat, tahun ini.

Beliau berkata, fokus itu mampu direalisasikan dengan kerjasama semua pihak dalam memastikan negara berada di landasan tepat untuk mara ke hadapan dengan lebih dinamik.

Sementara itu, Menteri Pertanian dan Keterjaminan Makanan, Mohamad Sabu, berharap 2023 menjadi tahun yang akan memberikan kebahagiaan dan keceriaan kepada rakyat dan negara.

"Sama-samalah kita bekerja bersungguh-sungguh sebagai satu pasukan untuk merealisasikan impian dan harapan rakyat Malaysia. Yang ringan sama dijinjing, yang berat sama dipikul. Selamat Tahun Baharu 2023 buat semua," katanya.

Menteri Kerja Raya, Datuk Seri Alexander Nanta Linggi, pula mendoakan semua rakyat mendapat keberkatan, rezeki serta kesihatan yang baik.

"Di penghujung musim cuti ini, ketika ramai yang merancang perjalanan pulang ke tempat masing-masing, saya ingin menyampaikan pesan agar semua sentiasa berhati-hati di jalan raya."

"Tambahan pula, di musim hujan ini yang berpotensi untuk menjadi punca bencana berlaku. Jangan tergesa-gesa agar perjalanan kita selamat hendaknya. Selamat Tahun Baharu 2023," katanya.

Program terbabit lebih kepada konsep tanggungjawab sosial korporat dan ia tidak membabitkan implikasi kewangan kerajaan. Ini sama seperti konsep kongsi rezeki, yang senang kongsi rezeki dengan yang susah. Walaupun sedikit, ini adalah semangat untuk kita mendepani isu kos sara hidup



Salahuddin Ayub,
Menteri Perdagangan Dalam
Negeri dan Kos Sara Hidup

Senarai Harga Barang Keperluan	
• Ayam	RM8.50
• Daging Lembu Tempatan	RM44.29
• Daging Lembu Import	RM50.90
• Telur Gred A	RM12.75
• Ikan Kembung	RM14
• Minyak Masak	RM6.35
• Gula Pasir	RM2.42
• Bawang Besar Holland	RM3.40
• Bawang Putih	RM4.88
• Cili Merah	RM8.49
• Kubis Bulat Tempatan	RM2.99
• Tepung Gandum	RM3.23

*Harga (RM/kg) Sumber: KPON